

Visoki predstavnik donio dvije Odluke o općini Žepče

Visoki predstavnik, Wolfgang Petritsch, donio je danas Odluku kojom se omogućava da se općinski izbori u Žepču održe istog dana kada se budu održavali ovogodišnji opći izbori za Bosnu i Hercegovinu. Općinski izbori održat će se u skladu sa Izbornim zakonom BiH a organizirat će ih Izborna komisija BiH.

Prijelazni odbor, koji je uspostavljen Odlukom Visokog predstavnika iz oktobra 2000.god., je uspješno ispunio zahtjeve koje su mu postavili Visoki predstavnik i Supervizor za Žepče. Visoki predstavnik je u septembru 2001.god. izjavio da se njegova Odluka o Žepču provodi na zadovoljavajući način. U skladu sa ovom Odlukom, Prijelazni odbor, koji upravlja Žepčem od kada je imenovan od strane Visokog predstavnika će vlast predati demokratski izabranom Općinskom vijeću, na prvoj sjednici ovog Vijeća koja će uslijediti nakon izbora. Nakon toga, izbori u ovoj općini će se održavati u skladu sa izborima u ostalim općinama.

Visoki predstavnik je sa zadovoljstvom donio ovu Odluku, budući da ista pokazuje da su ogromni naponi koje je poduzeo Visoki predstavnik te osoblje njegovog Ureda u općini Žepče dali rezultate. Okončan je dugi period bezakonja i paralelnih struktura u ovoj općini, što ide u korist njenih stanovnika te stanovnika okolnih općina – ovogodišnji izbori predstavljaju znak povratka ka normalnoj situaciji u općini. Najnovije brojke koje se odnose na povrat imovine pokazuju da je Žepče omogućilo da više od 90% podnosilaca zahtjeva izvrši povrat imovine, a sama općina je privukla značajan broj investicija od kada je ovaj proces započeo.

Drugom Odlukom Visokog predstavnika ispravljaju se i dopunjavaju imena određenih naseljenih mjesta koja su sada, u skladu sa odlukom, uključena u općinu Žepče, usklađujući ih na taj način sa imenima koja se vode u Statističkom zavodu Federacije BiH.